

贛州府志卷三

山川志 山

贛山贛水自漢時已有其名郡縣名亦因之贛州口南康郡隋書地理志載南康有贛山即南安崇義之聶都東山章水所自出也貢水出汀州新樂山統名贛水今南贛十六邑諸水無不匯章貢兩派達贛江山盤郡境水夾郡城攸關地理之大特專志之陂塘以資灌溉橋渡以通利濟古名流之踪跡鄉先賢之坵墓皆依山傍水千載芳馨並足供後人憑眺焉當從類附見立山川志

贛縣山

贛州府志

卷三

贛縣山

一

文壁山一名賀蘭山俗呼田螺嶺在城西北隅因巔爲臺名鬱孤一名望闕其左綿亘城北爲百家嶺又東爲龜岡昔建鳳凰臺臺畔爲景鳳山其西北直趨府治尾蟠二水合流處有章貢臺

筆峰山在城東南隅濂溪書院後遠對儲山東爲東勝山又東爲夜光山稱城內三山東坊爲獅古桂家二嶺西坊爲金圭嶺與北坊田螺百家二嶺稱城內五嶺

國朝楊爝筆峰山詩云閒步招提作勝遊筆峰高處一凝眸亭亭孤塔雲中出脈脈香泉戶外流山雨欲來風黯淡夏禽將變響喧啾人間饒有清涼地珍重光陰仔

細酬 宋犖東勝山詩云留滯雙江上招尋一壑間老
僧何處去此地任躋攀浥雨佛桑落窺人山鷓閒風流
錢翊在吟罷月中還 錢柏齡云望去招提境悠然林
壑間使君愛幽賞群從樂追攀苔色入秋淨禽聲薄暮
閒小山有明月留醉不知還
社岡距城二里一名鼓嶺每社日邑人祀神群聚岡頭會
飲
天竺山在城西四里舊有修吉寺唐元和初僧韜光自錢
塘天竺來駐錫於此故名後爲火燄山元叅政全普菴
撒里建亭於岡曰雷岡上有嘉濟廟明萬歷間贛撫王
敬明植松於上改名萬松亭又曰水雲深處

贛州府志

卷三

贛縣山

二

宋廖剛天竺山詩云好山積翠擁金蓮花屋籠雲傍石
泉秋沼芙蕖半開謝直湏饒占一壺天 李朴詩云天
竺崎嶇絕海邊何人分作贛江禪鷲山巧疊三峰石葛
塢深疏兩派泉一醉風光能幾許十年塵跡尚依然欲
題豹隱還相笑吟斷長空簇暝煙

馬祖巖在城東六里許馬祖曾棲於此故名巖巔爲佛日
峰有塵外雲端駒巖一憩吸江五亭俱廢其山勢接伏
龍山

宋廖剛馬祖巖詩云龍去龍歸已絕塵空餘巖石隱雲
根當時一夕猶嫌久豈謂虛名萬古存 去來踪跡等
遊塵誰向蘧廬覓道根巖穴故應無別異鐫題空有姓

名存周舊志作李朴詩云踏盡層巒上小亭□華初泛曉

煙青塵埃不到門常靜身世相忘性自靈 文天祥詩

云曾將飛錫破苔痕一片雲根鎖洞門山外人家山下

路石頭心事付無言 明呂楨詩云衆山攢雲石爲屋

中有兜率仙人宮廊魚敲歇僧入定耳根色界俱成空

東流吹花落紅滿醉裊吟鞭歸緩緩杜鵑聲裏又斜陽

老盡遊人春不管 國朝張宇初詩云鑿石開蘭若棲

禪結上方然燈聞佛磬聽雨宿僧房古樹巖雲合幽花

澗瀨長素耽坡谷輩了悟幻中忙 朱從延詩云馬祖

巖巖何高嵯峨勢插十雲霄橫盤鳥道石磈礧鬼斧下

鑿成危均籃輿難行歷險峻偃僂步陟身疲勞趨起動

贛州府志

卷三

贛縣山

三

喘欲休憩絕無竹木涼陰交微雲幸得蔽炎日拂衣時
覺天風飄風迴窄徑到講舍棟摧墻敗悲蕭蕭緬懷六
祖此叅乘蒲團趺坐安昏朝宗風遺教悟無相禪心盡
洗章江濤章江之水走千里合流怒瀑奔山腰四圍遠
列盡青嶂崖西缺處城非遙叅差如鱗排瓦屋鬱葱林
隙炊煙消孤亭岬嶮立雲際凌空疑有浮邱招通天獅
子皆入望隨首俯仰無煩翹馬祖巖巖何高董榕詩
云雲表一憇風冷冷千疊萬疊群山青貢江之水來東
汀週遭玉帶環金庭是日秋半飄三萸紫氣靉黳斜陽
凝仝遊四子俱豪英初至山脚還踰躔或慮昏黑迷山
形余爲一鼓爭先登那識上界如斯清佛頭螺髻文崢

嶮馬祖遺跡留巖扃徧巖題字蒼苔盈誰歟書者垂□
精濂溪清獻調琴聲至今想像松風鳴玉局揮手謝塵
纓戲留轉語詢山靈子韶豁然萬古情文山四絕尤匄
匄勤王攬勝資經營遐想忠武同文成有傳不傳煙蕪
平七賢把臂堪合并安得就址修堂楹鎮此俎豆千秋
馨頑廉懦立興羣氓巽峰一煥開蓬瀛奈何棄置荒郊
垆付與山鬼棲冥冥五亭無復存一亭區區有類愚公
誠印湏將伯相恢宏未卜此語何人聽喟歎聊和蛩吟
嚶蒼然暮色山嵐橫瞥見山下棲繁星珠輝萬點光熒
熒彎環拱照連斗閔毋乃星宿海中乘虛槎將與銀河
迎四子拍手齊相驚竒賞不負探嶺咎諦視乃是江船

贛州府志

卷三

贛縣山

四

燈千檣相照流復停少焉月自東山升瑤宮玉宇不可
名恍然十二樓五城星高燈下方分呈湏臾月上天中
行星稀燈淡尊娉姮余謂此景非尋恒七賢心印薪傳
經奎躔象緯聯晶瑩夜寒露冷理歸藤行歌相答心搖
旌五里下山攜月明歸來奉質諸友生勿疑禪悅煩譏
評是耶非耶爲余正

儲山距城北二十里俯臨清潭作兩江之砥柱其山下有
儲潭君廟 又東北十餘里石壁峭拔遠望類獅者爲
獅子巖

明呂楨獅子巖詩云古洞何幽閒新詩足品題晨光飛
野鳥春甕舞豔雞露洗花增艷風柔鳥善啼雲房僧□

久歸路日平西 國朝吳之章歸自靈山道過獅子巖
詩云歸途猶自憶靈山忽聽鐘聲樹杪間亂撲巖陰從
上下緩尋磴道復躋攀山腰靄斷禽將宿洞口雲深攫
正還到此不須愁日暮何妨燒竹出松關 林棟詩云
分明別自有員嶠到處尋幽歸興饒出屋鐘初沉下界
梯雲人欲上層霄倒懸夕照峰深淺暗鎖秋陰寺寂寥
同是遠公留客地東西林隔一溪遙 林植詩云長林
薄暮歸途遠又復攀躋看翠屏一線微分巖上路半天
斜出石邊亭人隨鳥度鐘初動僧待雲歸戶未扃回首
靈山何處是孤峰煙靄欲無青董榕詩云塵氛踈蠟
屐秋爽拂蟬衫閒過桃源洞來登獅子巖曲塍環水竹

複峽聳雲杉路轉逢開朗廡居貼峭劓土風忘漢魏景
象介仙凡閣突賔凭檻山空佛滿嵌院榴紅的的窻岫
碧巉巖晃亮浮江帶微茫辨客帆蜂歸朝短塢犢靜伴
長鑣遍踏頭兼尾誰操轡與銜拍肩談福地把袖檢香
函杖策尋幽返霞情不可緘

汶山即文潭嶺在城東三十里其山有龍翁穴穴西有昇
仙峰爲邱真仙上昇處其下有潭潭邊有龍鎮觀 其
東南沙阜特起洪濤不沒號曰浮洲世傳有仙女竺山
娘墓或隱或見時著靈異 嶺之西有響石壁立十餘
丈人語亦語過者長嘯輒相應荅 又西北爲馬脊岡
山脊類馬首鬃鬣俱肖 又西北二十里爲回軍嶺里

人方氏率衆却黃巢兵故名

崆峒山在城南六十里古名仁空山自南康數十里蜿蜒而來爲大峰山章貢二水夾以北馳爲一郡望山□高者爲寶蓋峰面峰有寺曰空山精舍前爲寶鏡池後枕玉屏嶂巔有石類鉢盂越山坳數里聳屹若覆罈者爲席帽山相接爲金標峰下有黃仙石舊傳一道人乘白鹿從石上凌雲去東行十餘里爲了髻峰峰麓有仰屏山寺又東北十餘里狀如雙鳳飛來者爲鳳凰山山之東巨石巉巖爲羊石嶺上有仙蹟遊者時得石筍精瑩若玉臨江赤石突起爲馬頭石噴龍石距崆峒東南二十里兩崖劍立飛淙下注爲龍湫唐十道

記及南康記皆云下有扁舸底人動之風雨立至有廣潤侯祠禱雨輒應自晉以來祀之又度牛軛嶺爲相見嶺及望州嶺踰十里爲四會峰高百仞其上稍平可坐百人傍有小徑可躋井源不涸又南高百餘丈突立於平田中者爲文秀峰渡江而南四十里爲大龍山中有龍井土人多禱焉又南界信豐爲武山□有石文如仙掌又東南爲牛嶺嶺後有青隱山山麓有巖豁訝幽邃曰花石巖國朝黃世成遊崆峒山記畧云贛城南望鬱然蒼秀者爲崆峒山一峰高矗而峭拔者爲寶蓋峰與寶蓋相聯絡者爲玉屏爲席帽爲金標爲了髻爲仰屏諸山總名

之曰崆峒山麓村落十數田數十百頃飛泉石壑土徑
與磴道相間行樹木中如蜀道蠶叢間夏四月八日偕
袁世紱李爲琅肩輿經谿谷中十餘里崇山蔽天水聲
淙淙不絕飛瀑奔流瀦石上石級數里類新鑿抵小山
庄則石氏居也主人延客宿翼日行十里乃上絕頂寺
面寶蓋葱翠入戶砌下寶鏡池清瑩可愛有五色金鮒
縣令張照乘榜其門曰崆峒寶蓮寺寺後玉屏二峰迴
合右爲席帽金標山均可視城中二水分流如帶寺明
崇正間始營古崆峒寺基去此幾二十里矣

宋李朴崆峒山詩云雲根秀出碧芙蓉煙晷霞飛瑞靄
中地脉九枝龍奮蟄天河一派練橫空 國朝吳懋謙

望崆峒山詩云岩巖望不極疊嶂迴連天平楚收殘照
孤墟淡夕煙空潭龍獨下暗谷虎交眠筇杖愁泥滑歸
途一惘然

赤石山在車邨距城二十餘里大石連聳燦若雲霞山角
多赤石有玉房瓊室狀相傳宋元嘉中有安道士棲此
數十年唐天寶中改爲玉房山明謝詔讀書於此

國朝吳家騏玉房山詩云虔西皆頽山山色類醜醉茲
巒燦若霞夙與赤城比中藏窈窕徑瑩潔玉房閱謝公
築草堂丹鉛自勤瘁彷彿玉山瑛名地兩無媿志乘成
一書郡事略云脩龍文怯獨扛鱗次無紊位嗣音誰珥
筆百年付茫昧搜採有宗工周鼎起沉泗跂望此山中

飄飄張赤幟

通天巖在城西二十里有廣福院院後空嵌若屋有穴口
山巔巖洞廣十數丈中歷三級有石象石田石鐘鼓內
通小洞亦廣數十丈深五六丈有石井石棋盤宋秘書
監陽行先隱此州大守林顏號爲玉巖翁有祠

國朝劉謙遊通天巖記畧云贛郡有通天巖宋秘書陽
孝本隱居處己丑九月廿日李君涵齋宋生韵泉訂遊
焉蚤起絕章水而西雲山出沒野翠迎送山徑險澁輿
馬不能進行頗登頓巖半四面就石壁刻佛像寺懸崖
上覆梵宇承其下吐茹半之僧引謁陽公像并視蘇公
手書像贊左折龍虎巖上鐫古人題句北向山脊蜿蜒

贛州府志

卷三

贛縣山

八

突起石梯百八十餘級元武殿踞其巔憑欄遠眺章貢
如帶羣山若瓜瓠蔓引煙氣迴薄隱下山穿石洞石壁
有陽明題句畧忘歸字巖廣半畝時行人經過者若了
不識此巖之異謂李君曰人情乍見則矜之久則習而
忘之彼迨習之者耶因相視笑曰贛名山不少而此巖
特稱非以陽公乎予老無能爲諸君其當思所自勝庶
不負今日之遊歸途已薄暮迴望所歷蒼茫失所在矣
宋伍餘幹通天巖詩云山靈不爲紅塵掃仙竇玲瓏自
天巧或開或合誰主張元氣淋漓出蓬島壓服坡陀萬
象高平鋪練帶三江繞水西接軫到斜陽勒馬回頭問
遲早不見眞仙只僞仙猶嫌禿髮頭顱老三生豈必石

點頭三晉何如石言好行先之後更幾人龍奔虎噬爭
雲擾吳人但見楚山高豈知砥柱千金寶山崩雨蝕不
知年各得併幪各相保出門小吏驚且呼虔州刺史心
生惱急着歸鞭信馬蹄春風猶帶蘭香草燒燈更上鬱
孤臺吳楚東南春未了 □演詩云每逢勝境便留神
一路桃花別漢秦遶剝苔封高士蹟臨溪客問野人津
紆回松竹看非俗羅列山川識有眞踏遍嶺頭天尺五
飄飄已覺迴風塵 胡榘詩云萬龕石佛坐觀空安用
懸崖駕梵宮縱使風雷窒巖竇此心原自與天通 明
王守仁詩云青山隨地佳豈必故園好但得此身閒塵
寰亦蓬島西林日初暮明月來何早醉卧石床涼洞雲

秋未掃 詩示鄒陳二子云鄒陳二子皆好遊一往通
天十日留候吏來歸久不至我亦乘興聊尋幽巖扉日
出雲氣浮二子晞髮登巖頭谷轉始聞人語響蒼壁杳
杳長林秋嗒然坐我亦忘去人生得休且復休採芝共
約陽明麓白首無慙黃綺儔 次陳惟濬韵云四山落
木正秋聲獨上高峰望眼明樹色遙連閩嶠碧江流不
盡楚天清雲中想見雙龍轉風外時傳一笛橫莫遣新
愁添白髮且呼明月醉深觥 次鄒謙之韻云天風吹
我上丹梯始信青霄亦可躋俯視氛寰成獨慨却憐人
世尚多迷東南真境埋名久閩楚諸峰入望低莫道僧
家全脫俗三更日出亦聞雞 鄒守益詩云高築琳宮

引石梯酒餘客散自攀躋坐來漸恐星河冷話久不知
煙霧迷白澗灘橫舟隱見翠微巖湧案高低浩歌初飽
清秋興何處東洲野店鷄董天錫詩云出谷尋幽入
洞天短簑衝雨憶春前鳥飛盡處煙低樹牛力新時水
滿田畫筆淺描青嶂色詩壇高詠白雲篇西湖鴈蕩尤
竒絕何日同遊續舊緣勝日郊行數看天雷聲忽送
雨聲前滑添絕磴難驅馬步惜春苗不近田興盡剡溪
思往事醉題江閣有新篇多君夙抱巖廊具老我聊隨
山水緣唐邦佐詩云怪石空懸山勢欹洞門低度日
光遲乾坤何意故留此今古有人來賦詩道路盡從樵
者得壺觴敢後大夫期不因簪弁妨山水我輩風流良

在茲結伴山中暫避喧每從佳處便停軒只疑蘿薜
峭無路豈謂雲根小有門到此頓令忘歲月看來別是
一乾坤松聲鳥語關詩思獨對巖頭兩不言丁繼嗣
詩云半壁雲深久閉關捫蘿直上欲追攀霏霏紫氣浮
丹竈隱隱青螺疊萬山花落有時僧不掃鳥啼何處客
思還竭來半晌蒲團坐了悟元機等是閑鄒德溥詩
云夏木亂芳菲乘風入翠微渾依巖作室半借石爲扉
幡影連雲動鐘聲帶雨飛高僧閒對語永日淡忘歸
國朝宋犖詩云凌晨越章波杖策遵江徼野日破煙霏
心閒展遊眺稍窮林薄紆遂歷岡陵峭千巖如蹲鴟突
兀歲靈奧既至儼堂隍通天惟一竅雕鏤信鬼二曲折

存遺廟山根洞穴穿，偃僂僧徒導豁然。世界殊飛空，石倒崎嶇難具陳。盤礴發狂叫，伊予厭囂塵。探竒慰所好，緬彼玉巖翁。彷彿聞清嘯，諸賢相繼來。忘歸領其妙，觸目多遐踪。眷言記同調，夕陽猿鳥鳴。移情此雲嶠，磨墨榻題名。千年碧苔掃，錢柏齡云蘭。楫亂奔流筍，輿出幽徼澗。路凌高寒晴空，恣雄眺越坡。停雲岡石勢愈巉，峭仙源湛水木萬古藏。僻奧鬼斧亦何工，玲瓏鑿一竅。碩人此盤礴，千秋儼遺廟。仰瞻媿後塵，冥搜託前導。更窮邃洞紆，忽訝懸崖倒。羣山青濛濛，惟聞猿狖叫。既異少文遊，良慰康樂好。想見開闢初，矯首發長嘯。憑弔多古情，歷覽收衆妙。詎惜下里歌，上擬白雪調。待緝薛

荔裳來卧芙蓉嶠，爲問巖棲僧。荒蘿幾人掃，張尚瑗詩云青冥呼吸此中攀。萬丈丹梯指顧間，只恐明河解。迷客罡風小劫又塵寰，一竇玲瓏似鑿坏。玉巖遺像浸莓苔，高情合與名山占。不藉陳牋武帝臺，見說移龕紹定年。幾緡風月買山錢，嶄嶄兩袖寒巖骨。可得癯於謫吏肩，蕭師諤詩云秋霽豁胸臆。願言覓幽徼，緩步陟岡巒。秀削芙蓉峭，虬盤徑復迴。洞壑秘竒奧，神哉五丁力。鑿破混沌竅，一穴窈而深。懸結梵王廟，側石巨玲瓏。竇穿危欲倒，巉峻落天風。拊掌發狂叫，寒夜靜追尋。恍聞孫登嘯，霜月照孤吟。悄然觀竅妙，緬古企前賢。把酒命同調，偃卧白雲根。詎殊在壺嶠，松落不知年。自

有清風掃 徐垣詩云聞說茲巖好玲瓏透碧天誰憑
巨靈手鑿破玉峰巔雲鎖凌虛閣虹流絕頂泉陽公遺
跡在幽訪愧無緣

忘歸巖在通天巖半壁穿心龍虎翠微諸巖皆附其處石
壁鐫宋元明人題詩 東一巖中穿一徑名品巖 其
西南諸峰根蟠數十里屹立高聳者爲九峰山東至於
江巨石巋然其巔曰仙女祠蠶者禱焉 又西北十餘
里上轟三峰下隱龍湫與崆峒對峙爲郡治後屏者曰
蛤湖山又曰三陽山西接杏林山

國朝邱成和遊忘歸巖記云余寧都西郊峻石如雲金
精之十二峰在焉貴池吳印浦正名寓居其中與余爲

忘年交印浦數客越中交錢塘黃北原禹錫既而余在
贛印浦北原亦先後至余因印浦交北原於是余三人
者有忘歸巖之遊西踰章水二十里山益幽石益峻徑
益險乘肩輿者下騎者步聞泉聲潺潺石間益急遂自
通天巖陟其巔歷元帝閣緣峭壁下穿石竇出至忘歸
巖巖壁有王文成公詩余三人亦各爲詩次文成韻而
去蓋至忘歸巖則境愈竒矣巖巒之盤錯丹翠之交集
停雲之峰俯幽之壑態狀各殊十步九變有似余金精
間也夫金精余與印浦固朝登而夕降之矣獨北原以
不至爲恨以余所聞吳山一峰左江而右湖北原印浦
□朝登而夕降之矣獨余又以不至爲恨且文成亦越

士也彼其於少伯之所泛子陵之所伏安石靈運之所
追攀而流連者宜目而熟之足而倦之矣今讀其詩何
亦甚愛忘歸巖豈山川固互相爲勝歟抑其人必兼取
之而後快歟然而北原之言曰友身之分也則余與卬
浦日爲北原坐金精而卬浦北原亦日爲余立吳山也
尚復何恨是遊也有卬浦故人子鮑承祇昱以爲主人
而北原兄津園中錫不與遊亦俱有詩

宋胡榘忘歸巖詩云穹巖如屋聳翬飛俯偃嵌根邃徑
微透脫空虛真出世徘徊何啻淡忘歸 翠微巖詩云
清獻濂溪二老仙風流景仰一時賢摩挲石刻追前躅
蘇暈蒼崖愧續鐫 陳宗禮詩云往事鐫鑿一夢同遊

人聊此可從容神仙已逝境猶在洞府雖深石不封閱
遍古今雲木老洗空塵土石泉春此懷清白堪超世何
必星精特地逢 明王守仁忘歸巖詩云意到已忘言
興劇復忘飯坐我此巖中是誰鑿混沌 尼父欲無言
達者窺其本此道何古今斯人去則遠 空巖不見人
眞成面墻立巖深雨不到雲歸花亦濕 國朝周令樹
遊忘歸巖詩云久識忘歸路茲遊心倍閒秋聲吹大壑
落木滿空山地僻藏猺女林喧出峒蠻慙勤吳季重相
對破愁顏 丁煒次陽明韻云霽雨淨嵐陰冷冷巾帶
□崖厂納清虛遊神寄山島已悔入林遲偏虞出谷早
迴風度晚鐘煙庭黃葉掃 黃世成詩云崖斤兩曲奧

中洞含清暉縣溜泐舊題摩挲澹忘歸願逐赤松侶
將白足依舉手謝時人躡履凌空飛

西隱山距城西四里雙阜特起一名佛嶺昔有二亭介其
間曰御風曰大觀今廢

明蔣曙西隱山詩云苔徑縈迴少四鄰小橋流水淨無
塵歸雲碍馬閑留客好鳥穿花不避人坐愛崆峒當面
碧漫吟風月滿腔春酒闌小立重翹首憂國思親感慨
頻

龔公山在郡北一百二十里昔有隱士龔亳遯跡於此今
爲寶華寺馬祖遺跡及勒潭龍井在焉其北爲分水
嶺爲龍頭嶺又北東爲徧嶺山自山西行越小雪嶺

贛州府志

卷三

贛縣山

十四

抵萬安界爲黃唐山空洞竒秀仙靈窟宅鄧德明南康
記疏爲贛山今割隸萬安距龔公山西南爲楊梅嶺爲
天南山舊有盧光稠驛亭西望怪石萬狀者爲順山
山最高歷三十六垵乃至其巔自順山而南爲社山
山接馬頭嶺上有廟
唐孟郊分水嶺詩云南中少平地山水重疊生別泉萬
餘曲迷舟獨難行四際亂峰合一眺千慮并潺潺冬夏
冷光彩晝夜明賞心難久勝離腸忽自驚古木搖霽色
高風動秋聲飲爾一樽酒慰我百憂輕嘉期何處定此
晨堪寄情宋楊萬里過分水嶺詩云路險勞人役儂
□下轎行石從何代落蕨傍舊根生古樹無今態幽泉

有暗聲只言章貢近猶自兩三程
憇分水嶺望鄉詩
云嶺頭泉眼一涓流南入虔州北吉州只隔中間些子
地水聲滴作兩鄉愁
嶺北泉流分外忙一聲一滴斷
人腸浪愁出却廬陵界未入梅山總故鄉

西華山距城東北百里有真武殿
初自天寶六載勅曰
靈帝古殿猶存

按通志云此山每月朔口雷火掃殿宇雖值晴爽亦
雷電間作

金螺山距城東北百里因掘土起剝得小石數斗如螺悉
赤光如金故名上有石佛

鹿山距城東百里宋勅封妙高峰上有寺山巔一石如人

贛州府志

卷三

贛縣山

十五

立相傳吳生佛於此騰雲去其附山而雄踞江畔黑斑
如虎者爲虎面石

象龍山在城西北百里旁高中窪有石鍋石竈

玉石山在城北四十五里山俱黑壤惟片石鮮白如玉寰
宇記云昔有瞿氏釣山下有二少年皎若冰玉謂曰別
來此石長殊駛已忽不見石上有冬桃樹及石杖云昔
有引杖擊桃者去而留杖於此

合龍山在城北百里荒寂無人居山接天師山距山十里
有龍蟠龍爪二石西接黃竹嶺爲龍泉界

錦屏山在城北九十里狀若列屏與雙秀巔相望
越十里爲南高峰舊名崑嶺
有峰如覆釜者爲金龍山

接烏兜巖有瀑布溪澗環流爲入省孔道

按嶺北諸山由大庾趨贛章貢二水夾山蜿蜒而來融爲郡治其脈絡可按而知也攷前人贛山之說有三一廬陵有玉笥山贛山馬氏文獻通攷之說也一萬安贛縣境有黃塘山疏爲贛山鄧氏南康記之說也一指崇義縣聶都東山爲贛山隋書地理志之說也廬陵黃塘並無攷當以地理志爲準蓋豫章水出聶都東山即贛水也山海經有贛巨人贛字始此漢初立縣即以此名水曰贛水山曰贛山皆緣字爲名其名最古漢末立廬陵郡治泰和贛隸焉晉置南部都尉於雩都亦隸廬陵郡然則文獻通考稱廬陵有

贛山當即指聶都東山就所隸之境言萬安最後析介泰和贛縣之中黃塘山當贛萬二縣之衝而十八灘經流黃塘山之趾江多亂石即所謂贛石德明或因山與贛石相近遂指爲贛山歟然終不如隋書之說爲信而有徵也

雩都縣山

雩山在縣北三十五里古禱雨處爲邑治望山雩水出其下入於貢山麓有雩山廟

明袁淳仰雩山歌云我所仰兮在雩山曾扶瘦竹相躋攀石壁崔嵬凌霄漢三十六峰相迴環有神云在縹緲間逢早能雨答黎頑我欲追蹤與往還山悠悠兮水潺

潺 夏寅詩云雩峰屹立壓峨嵎上有元朝感雨碑我
作記行詩未畢升車忽起片雲隨 國朝黃元捷詩云
一朵芙蓉萬仞青層雲矗透碧亭亭有神能作堯時雨
不使蒼生歲乞靈

長布心嶺在縣北三十里地形綿亘若疋練 又距縣八
十里爲龍溪山盤曲叢箐界連興贛昔多嘯聚
古田坪在縣北五里即漢灌嬰始立縣治處有東溪繞其
後 又北百里曰蓮華山聳秀如蓮華有山若垂幙然
昔有神僧結宇其上祝天子萬年因名天子山
固石山距縣北百里即展誥山宋岳飛平彭友處 東北
爲玉屏山飛議立巡檢司於此今廢

贛州府志

卷三

雩都山

十七

高沙寶嶂在縣東北百里三峰品立宋時樵者見白兔逐
之入地掘地尺許銀礦湧出故名

仔童山在縣東北一百八十里爲雩興二邑發脈處

一作峒

禁山在縣東北百五十里與張家山相連東望寧都西瞻
興國南眺雩都昔人禁彼此無相侵擾遂名

烏石山距縣西北十里許又五里曰古木嶂與烏石夾溪
而峙 又三十餘里曰鳳凰嶺稍西曰增坑山南泉山
又曰黃土嶺石函嶂地接贛縣

靈泉巖在縣東五里瀕江有石水從石出一名出水巖上
有佛廬 距一里曰牛牯石爲寧會兩江砥柱 隔江
右十里爲青釣山飛淙濺沫名青山瀑布自巔而下春

夏□雨居民候其聲以避昏蟄迤左十里爲黃金峽
距峽二十餘里爲望夫石 逆水東北二十里爲寒
信峽與車頭嶂雙屋對峙梅川貫其中每歲暮峽中先
寒故名俗訛爲韓信立祠其旁

明邵元瓘靈泉巖詩云佛子閣前江可憐輕風吹動水
漣漣一枝兩枝桃實碧千朵萬朵榴花鮮古蹟常尋詩
句外山人忙跪長官前方知俗吏存形迹笑倒昌黎與
大顛 譚孔經寒信峽詩云尋幽賒逸興暫爾避塵氛
共此一川水俄開雙峽雲草香經雨歇松韻與泉分向
晚山風厲歸途落葉紛

羅石在縣東南五里其上平行可容數百家鄉人結寨避

贛州府志

卷三

零都山

十八

寇號羅石寨 逆而東爲三豐山梓山南田嶂烏仙嶺
又東距縣七十里爲青雲嶂積翠浮空嶂頂有梵剎
山腰林麓僧寮甚多 逆折十里爲龍頭山界連瑞金
與銅鉢山對峙

柴侯山在水頭里距縣七十里以漢柴侯劉叔喬葬此得
名詳墓 又距縣百里曰皇帝巖昔蕭帝讀書於此故名
距巖五十八里爲珠玉山舊傳產珠玉南康記云山高
峻有珍禽香草

干霄山在縣東南七十里南康記云產松杉莞筍石蜜
丈鼓石在縣西十里 隔江六里爲金鷄山南康記云山
口貢水旁有穴廣四丈相傳有金鷄出入 又距縣四

十里爲太平山有穹崖邃谷瀑布幽蘭

唐羅隱金鷄山詩云怪石嵯峨枕碧溪世人傳說有金鷄試問溪邊漁艇客一宵還有幾聲啼

白雲山在縣西四十里即白雲堆相傳龍湫也列三穴嵌空玲瓏上曰白雲巖中曰太虛巖下曰龍巖各可容百餘人石乳重重欲墮五色絢爛扣之作玉磬聲溪流貫注之復有石狀如龍泉出其口邑人袁淳引水爲流觴之玩題曰洗心

國朝梅賁英西山白雲堆記云余嘗往來西峽遙見白雲片片飛入空翠中則相與指而語曰此必白雲深處也順治乙未仲冬始與諸子訂西山游放舟夕陽及岸

則江村月落矣明日舍舟陸行使山僧道之行二里許奔壑層崖嶙空盤曲僧向余曰舊龍湫也龍去而窟出矣得門焉篆曰龍巖級而下敞如堂堂左一石倒垂類渴貌獰龍髯甲飛動對之色慄石微竇水溶溶出潑流若帶然不辨其自何來也後有石榻翠幕周垂深冥如奧方謀坐榻上忽白雲從空際飛來鴻鴻濛濛形色半沒逐煙而出折而上徑漸險駭鹿驚麀雜馳林樾進此即太虛巖也雙懸碧乳形類鏞鼓僧以石投之鼓聲不壯鐘則錚錚如金玉石落而響不歇余曰非子瞻所云周景王之無射乎戀其響不欲去步巖後小洞洞甚黑窮之忽中透一縫天光微渺即所稱一線天也出洞口

西登其巔及半見翠壁破空雲氣滃之不問而知爲白
雲巖矣石皆五色珠光嵌空靈瓏恍惚炫目分坐石上
命童子疾穿之倏忽隱現如後鶻出入雲中不可提摸
余拊石歌曰萬壑染秋雲乾坤怪未了遊人無古今天
風醉花鳥躡白雲巖而上滿山皆采石光潤靈竒如空
天散采色態幻變僧曰此非所謂白雲堆乎余與諸子
摩挲碧落眞令人作天際想僧請下山菴禮佛澗水步
步隨行人飛流間僧水從何來曰自洗心巖余愛其名
急令引至巖頭狀若龍首泉噴口中瀆湧怒發方知龍
巖之水至此始出也沿溪歸一帶潭煙石霞飛舞追送
余徙倚久之回望白雲堆如天半采霞飄忽斷續龍巖

如老僧劍客幽壯蒼寒太虛巖如謝道韞坐青綾步障
中神情散朗至於雕空鏤影如騷人才士抉怪搜竒者
則白雲巖也是日宿舟中覺雲片紛披几榻間遂呼童
子敲火爲之記

明袁淳龍巖詩云三絕懸巖石磴通洞門長日白雲封
石床綠濕飛泉噴千古人間幾卧龍 國朝梅賁英詩
云老蛟盤神窟呼氣吐靈液空明結怪光蒼蒼滴寒碧
倒石挂秋雲離離幾千尺石破噴洪流水與石共白石
靜水搖之水動而石赤久立荒濛中窈冥蕩素魄

峽山在縣西六十里兩山對峙袤亘十里貢水貫其中有
沙洲長二百餘丈南康記云遙望有夜光若火從峽溯

流十里至蛟窟而沒唐天寶時改夜光山下有路通口
仄險傾欹宋嘉祐中縣令沈希顏始開鑿元泰定甲子
主簿張某郡人穆君寶鄧元德明正德丁丑里民杜榮
相繼重修國朝康熙庚寅知縣盧振先捐俸鑿廣五
尺遂成孔道

按峽山名夜光山通志及郡縣志皆然寰宇記峽山
謂之雩峽在縣西北五十里夜光山在縣西北八十
里與志異

明何春石峽詩云鐵壁中分鳥道微誰將玉斧破天機
舉頭見日山生雷轉眼流雲石褪衣葉重定因花影瘦
條柔應是柘陰稀方知禹鑿龍門意却笑金牛用計非

贛州府志

卷三

雩都山

二一

國朝丁焯過峽口詩云青靄結層岑朝暎翳回麓掉
鞅越林阿寒松淒以綠嘉卉競紛葩幽禽響邃谷夷猶
涉清溪漣漪淨如沐暫假濯纓娛希心塵外躡登頓歷
修塗駮駮互起伏巖壑恣延紆煙霞盛覽矚向夕望崦
嵒昫昫繡壤錯農人穿黃雲腰鎌穫秋熟會詠幽雅詩
南畝勞載俶丁焯云曉色動高旻秋氣散晴麓彳亍
攬晨鑣蘭臯踏寒綠稍隨樵牧蹤迢遙出巖谷雩溪何
透迤澄泓炯可沐羨彼鷺鷗羣飲啄閑躑躅野老啟柴
荆山龙吠且伏浣女避行人延緣迴盼矚下馬陟屺屨
瞻懷趾履錯林憇楓柏紅果欣柿栗熟心折鹿門龐征
裝方此俶

石寶穴距縣七十里瀕江舊傳有黃衣人候舟乞食既飽唾去竟入石中回視所唾皆金

羅田巖即善山在縣南五里巖洞有三兩旁相通其形如虎宋時荆華巖院周惇頤倅虔時遊此賦詩巖西有別一洞天壁有宋岳飛文天祥題句

明何春觀善巖記云宏治壬戌遊羅田閱及三先生祠石正德辛未始獲其故址建廟立主焉尋拓斯巖題名觀善構數楹以藏修遊息數十年景仰之心乃遂爲之記曰仰觀法乎天俯觀法乎人泛觀法乎萬物以善乎其身家天下及後世夫是之謂止於至善羅巖別號善山取相觀而善以發其義是故冠之以觀也又明年陽

贛州府志

卷三

雩都山

二二

明先生嘉惠以大書小序自廷仁正之來余復何言論者以爲立意命詞懸如合圭咸無心也可見天下之道一人性之善皆可以爲堯舜且記斯舉之本末也

陽明先生觀善

巖小序云善吾性也曰觀善取傳所謂相觀而善者也何附記後

宋周惇頤嘉祐癸卯正月七日邀餘杭錢建侯四明沈希顏雩都王鴻遊羅田巖詩云聞有山巖即去尋亦躋雲外入松陰雖然未是洞中境且異人間名利心岳飛羅田巖訪黃龍舊跡留題云手持竹杖訪黃龍舊穴空遺虎子踪深鎖白雲無覓處半山松竹撼西風明王守仁遊羅田巖詩云路轉羅巖一徑微吟鞭敲倒白雲扉山花笑午留人醉野鳥啼春傍客飛混沌鑿來塵

却老姓名空在舊遊非
洞前惟有元公草
貽我餘香滿袖歸
袁慶祥重遊羅巖詩云
不到羅巖又十年
嵐光樹色只依然
久忘朝市無塵夢
自愛林泉亦舊緣
草履倦依松下石
村酤不廢杖頭錢
山花山鳥渾相識
漫興題詩愧昔賢
羅洪先宿羅田巖詩云
古人不可見
空谷有遺音
一卧白雲上方知
靜者心
林風開霽色
巖月下峰陰
悵望千秋後
庭前草自深
薛甲云
茲行有佳趣
山水自知音
幽壑生虛籟
高峰下夕陰
煙蘿人去遠
蘋藻意何深
剩有閑風月
年年足賞心
羅汝芳云山谷雙黃鳥
嚶嚶來好音
名巖方獨往
多士偶同心
陟嶠寧辭險
尋源莫厭深
元公開絕學
遺像儼峰陰
李涑

云重訪山巖勝依然
樵採音盤中
黃獨味物外
紫芝心石壁生雲氣
藤蘿下夕陰
昔賢巾拂在
秋色古祠深
張鰲詩云
我思昔人獲我心
洞壑窈窕雲中尋
松桂交加發
新意禽鳥啾嚶遺
好音圖書不見庭
草綠衣裳空照山花陰
巖戶高歌黯惆悵
海月江風無古今
葉本重九遊羅巖詩云
客鬢秋逢又一年
尋僧時許拂蘿煙
菊期真藉朋尊倒
詩屐頻從鳥道穿
山際石盤藏古屋
天空木落下
晴川便思刻盡巖頭竹
留作登高古事傳
國朝程道摛詩云
選勝尋幽動遠思
石門松徑路透迤
白雲深鎖濂溪閣
蒼蘚陰埋武穆碑
峭壁有泉山應響
虛巖無暑日來遲
萬峰秋色迷遊子
疋馬天涯何所

之□易學實追和岳武穆韻云長松吹霧卧虬龍篆綠
鋟紅石上踪話到功名塵土夢何如敲句帶秋風梅
賁英云諸君何日醉黃龍雲壑空傳杖履踪最是馬蹄
南望後兩河夜雨八陵風管天植云聞道安禪制毒
龍至今伏虎有遺踪白雲深鎖巖前樹清磬遙傳野外
風
通巖距縣十里山腰前後洞徹內通往來宋紹興間知縣
黃士宏鐫額慶元間邑人謝時舉勒銘又二十五里
爲慈果嶺稍東逆折爲堯塘三嶂爲磊石□□公嶂石
人嶂

斗巖在縣西南二十里前有小阜七因名唐時梁真人修

贛州府志

卷三

雩都山

二四

煉於此巖頂有梁仙古檜又十里爲獅子巖距縣

百里爲祁山安山祿山界連信豐

明袁慶祥獅子巖詩云選勝聞巖久因循過十年僧房

半榻在佛座一燈懸花氣因風到泉流逐石還從今幽

興發時欲破苔錢

需巖在縣南四十里上下兩穴鑿磴而通其形如獅宋孝

廉王鴻隱此有泉曰靈光液松曰甘露巖曰木樨洞曰

涵虛臺曰釣臺皆鴻篆跡需塘需園遺址尚存其山腰

弇深若堂磴道僅容側履

明羅洪先夜宿需巖詩云香臺遙在最高峰一宿身同

出世中鐘後殘經過半夜巖前古佛傍孤松吟當萬壑

音偏遠夢入諸天念轉空聞道草元曾此地却憐相憶
不相逢 何春需巖晚景詩云日送長松上帳厨扶踈
影挂老龍圖年年好景春三月處處高懷酒一壺嶺插
暮霞裁斷錦花含宿露綴明珠從頭造化閒收拾不負
乾坤一丈夫 需巖曉發詩云曉色分明夜雨餘地偏
心遠却堪居西山影亂東山樹大澗泉連小澗渠險割
羊腸愁蹶馬砌生鵝子快顛車籃兜不用頻飛去青眼
茫茫海濶如

龍門石在縣西南一里下滙澄潭夜有紫氣歲大比或聲
裂如雷俗謂龍門開必有掇巍科者 南上里爲寬石
高平聳峙上可避寇 又距縣二十五里爲鯉魚石赤

贛州府志

卷三

雩都山

二五

石瀕江狀如遊魚

元劉君賢龍門石詩云石下清溪石上苔坐將兩脚洗
黃埃波深雨冷神鰲隱收拾綸竿屬後來

康石巖在縣西南三十里有五洞土人傳有飛仙舊跡
又距縣七十里爲左坑山山下有龍湫時吐雲氣禱雨
靈應 逆折二十餘里爲黃連山舊傳陰雨晦冥嘗聞
音樂聲或云山產黃連

信豐縣山

南山在縣西南一里與攬秀亭相對左枕花村右襟桃夢
山勢由穀嶺綿延奔伏達邑治而南爲金文寺即南山
寺也寺有野老巖巖東有釣魚臺一名彈■阿下臨桃

□

國朝李霖遊南山記略云信豐多山南山峙縣治之前
嶂若列屏秋九月諸生約余登高秋風寥沏爽氣襲人
乃出郭門西里許趨山麓逕甚仄草柔滑不可上牽衣
登老木蒼藤灌莽紛錯數折乃抵山腰有古寺由寺側
躡磴至山巔望遠近雲煙嵐氣環抱城郭一塔孤撐宛
如天柱左則平疇曠衍人家紛如碁布右界桃江之水
紆迴滉漾映帶林薄東跨一橋橫亘如虹去過呂公墓
讀其碑字剥落不可識下經奉仙觀聞踈鐘隱隱則獅
子林也境特幽歷幾村落始至寺竹引踈風綠陰如海
有攜酒來者余咲曰得非白衣人乎興轉酣舉觴浮白

贛州府志

卷三

信豐山

二六

不覺竟醉乃返比至城夕陽下山矣

張瀚遊南山詩云石磴迂迴上清陰望不分林深長蔽
日山僻欲生雲劫火餘殘寺荒碑訪古墳縱觀來絕頂
羣岫亂斜曛

穀山在縣西三十里有石如人下臨穀水產翠雲草九域
志云山下地名穀田山頂有池產五色鯉上有晉九江
太守葉率廟今廢爲寺由寺折而南十五里爲芙蓉
巖懸崖乳泉琤琮下滴又東爲銅鈴砦南爲馬鞍山
西北爲九日岡其頂方而夷可坐百人與南山咫尺相
望

國朝黃文澍遊穀山及仙濟巖記畧云秋八月既望四

日灑水張瞳莊城北王公冕偕而遊焉適雲間潘雪溪
與寺僧樗木有約先至於時秋空如瀉淡煙依樹循嶺
西南沿厓躡磴五里至仙濟巖巖駮駮硤硤其下穴而
窪中窻窳而宏突若重樓巖頂小洞九三疊不假陶甃
椽楹爲佛殿僧房者十餘厓壁蒼黝松檜薜荔垂髻俯
映懸泉從雷端傾簸颺空而下如珠散落遇藤蘿引之
則玉螭夭矯飛歎一泉傳昔雄州葉氏女生而瘖忽乘
風雲至巖頂蛻化祈者多應前明成化間鑄銅像祀之
巖是以名既登穀峰之巔閩山粵嶠可攬而接也

明劉貴一遊穀山詩云步出城西隅遙遙度空谷白雲
隨行踪石上或相觸落花從風飄翔鳥凌虛速解纓臨

清泉散髮對踈竹悠悠只自得擾擾竟何欲 吳百朋
穀山即事詩云山城曾駐王公節我亦提師穀嶺巔偶
爾笑談擒孟獲敢云功伐勒燕然三軍死戰輕三伏百
姓生全可百年白髮漸生金革裏歸田無計愧先賢
蔡汝蘭詩云聞說仙巖倚翠微閒隨野鶴扣雲扉兩江
錦向桃枝合百里春從柘影歸回首崆峒無障翳大觀
滄海有漁磯風塵老我煙霞舊此日何緣一振衣
國朝張執中詩云林下輕風蹙水紋暫攜吟屐避塵氛
肩輿小隊原無擾樽酒佳蔬亦自醺路轉忽驚飛白練
坡平偏喜亘黃雲山禽漫喚遊人住西崦俄看翳夕曛
俞世沛芙蓉巖詩云瀑界天山碧溪迴路忽分口聲

兩岸葉暮色萬重雲野鶴同僧靜閒花浣俗氛耦耕□
有待清興發微曛

猶山在縣西一百二十里上分九十九面

明張純猶山詩云猶山地脉眞花木四時春古石留仙
蹟清泉浴佛身禪心閒老衲懷抱散幽人絕頂憑高眺
煙霞近紫宸

廩山在縣北三十里後漢書郡國志云南野有領山隋書
地理志及文獻通考作廩山豐隆如廩唐改縣以此得
名明主簿李鳳朝與賊戰死山頂即瘞焉呼爲主簿腦
志勝云山下湖水出五色鯉山高一千五百五十丈
平石山在縣南四十里流泉不涸頂有巨石方平丈許故

贛州府志

卷三

信豐山

二八

名

金鐘山在縣南四十里二石筍高數丈絕頂有古寺又
前爲羊馬石石磴數十級四周如墉中平如砥可容數
人又前爲鐵石巖巖有二門相對空洞寥豁舊有鐵
石打金鐘之謠又前爲石井龍巖昔龍穿而過現右
爪至今巖有爪跡歲旱禱之鳴鼓則泉迸涓流鳴金則
溢涌又南爲三明山三峰鼎峙石墪五層有泉泓然
不竭又南二十里爲吉錢岡上色赭圓如錢故名
武山在縣東五十里□□列岫望若屏障上有天池周環
皆石雨後瀑奔溪溢輒有松子浮出礪壑幽仄人跡罕
到相傳唐武氏之族避地於此其麓爲竹邨右爲小夾

山又名大小夾列如棨戟上有龍湫又迤邐爲綿山綿水出焉折而前有峰曰鳳凰石兩峰如聳翼昔傳有鳳止其上

國朝劉宏鈞東郊勸農歷武山諸勝詩云虔南氣候殊三月秧早蒔行行出東門廿里山嵐膩因坡治爲田密比排鴈翅笠糾紛主伯餉饁走婦稚惘然念民勞有懷慚撫字舉頭訝屏列武山浮積翠昔聞武氏族避跡在斯地空聞澗口松偃仄足難跂右旋入雙夾劍戟森排比膠粘欲墮石俯仰令心悸邈迤來綿山山下衆泉委濬爲綿江源湍激若雲駛幽興未終極紅日忽西墜山花映歸步農唱尚媿媿茫然一回首絕壁孤松倚

贛州府志

卷三

信豐山

二九

香山在縣南八十里有峰九十九小溪十八多產異藥志勝云昔人見百鶴翔集各止一峰一鶴無所止羣鶴復飛去山巔有石似鷹欲下攫者曰鷹石峭兀似門者三曰三天門柱立而排列者曰綿香石曰蠟燭石偃僂如扶行者曰長老下山石有龍湫色澄碧以石投之響越山谷其麓蒼崖萬仞夾峙若屏屏上列山水鳥獸怪偉若繪有哀道人巖道人賣藥於市夜宿巖中一日忽去書萬山哀道人造巖住八字於石今墨跡猶存

明俞雍香山詩云生平清興在蓬壺浪跡行蹤且自乎舊社九人誰是我當年一鶴豈今吾勢蟠宇宙雄圖□

峻擁峰巒秀色鋪爲問山靈靈在否掀髯長嘯海天孤
黃戴元哀道人巖詩云漆園花蝶去無歸石窟蒼茫
接翠微嶽巘路窮行委曲高低峰遠望依稀竒雲赤色
初疑畫撲地青苔欲上衣汲水煎茶供野渴丹爐又見
火煙飛

黃栢山在縣南一百二十里上有龍湫禱雨輒應 又南
二十里爲聖山巖峩插雲石砰廣十數畝文如九宮八
卦竒三偶四

明俞通聖山詩云偶來攜客上方遊樓殿飛空紫翠浮
此度登臨絕塵想致身何必在丹邱 雲滿青山水滿
溪回頭遙覺四天低誰能棄却人間事來向竹林深處

贛州府志

卷三

信豐山

三十

栖

龍平山在縣南九十里俯瞰磬石灘上有照鏡石圓逕二
丈許瑩白明淨晨曦照石南雄人望之如鏡 又有響
石廣丈餘與人聲相答

國朝黃天策響石詩云百尺煙霞接鏡輪歡呼相答藹
紛綸雲邊語和疑天籟野外聲傳詫谷神巖溯武康分
大小峰追寧德互嶙峋同聲想見參差應鳴扣無虛自
大鈞

黃石洞距縣西南八十里有石人作兜鍪按劍狀旁有石
獅象踞其左右山半有小洞深險人不能至飛淙緣口
而下賁濺如珠 又南爲三峰石參立如筍向北石戶

方廣若削向傳戶有二竇通兩峰窅窳明曠緇流聚藏
不守戒律一道人過而叱石石閉羣僧殲焉祇留一龕
可容數人峰後峭壁皆數十仞又有松子石三十餘
國朝吳家騏三峰石詩云肩輿向夕停顛厓蒼茫佇眺
手自又澹雲微靄忽開豁擎出三瓣青蓮花挺若榮與
戟排若齒與牙叅橫鼎立插雲表絕壁千仞臨無涯向
北闢石戶偃僂而入通窾窪曩傳窅窳達二竇喃喃魚
鼓紛袈裟道人叱石閉緇流化蟲沙祇留一龕輿而曠
枯坐摩詰猶趺跏青燐野火夜霍霍狐踪虎跡相交加
語怪非所許里氓徒銜誇呼輿欲往阻幽仄樵逕詰曲
如盤蛇前邨山店扣戶去迴首數點歸飛鴉

古株山在縣西南一百里邨名蕨壩石色蒼黝壁立竹樹
陰翳左右碧澗琮琤如琴筑

國朝章履成古株山詩云品山不必竒石色先瘦皺鎌
盡肥與濃價乃萬金購虔山多嶮嶢頗遜吾吳秀茲峰
雖一拳同源忽異構青壁堆瓏璽蒼紋羅篆繡竹樹繚
繞之碧澗喧左右舍輿憩其麓逃暑如脫疚茶亭解午
渴溪釣踏飛溜冉冉樵婦羣花鶉鬢光黝對此欲忘倦
幽鳥正啼晝恨不遭阿章攫之入懷袖

衢孚山在縣東一百里土神曰衢孚因名麓有溫泉北爲
河田山綿亘數十里林木叢翳與安遠接壤安息水出
焉東北爲通天峰火結岡 又北東爲鷹嘴嶺涼繖

竦長老山皆高壁際天 稍曲而西爲禾溪山羣峰羅
立明正統中討石背賊駐師於此 又東爲周坑山有
劈斧崖高百仞泉石牛乳石硯廣丈餘高數十丈泉流
硯內歎瀉深潭遠觀若跳珠 左爲裏羅山中有龍潭
周遭列怪石有方石可坐數十人 右爲螺峰宣德天
順間賊寇據爲巢順治三年廣寇復踞其地
青龍山在縣北一百三十里志勝作新龍山僧普濟卓錫
處塢猶存有寺曰新龍 又南四十里爲靈麓山上有
聖壽寺產紫草

壺山在縣南一百八十里頂有天池石巖巖有風洞產紫
草藥果寺曰大龍相並一山差小爲小壺峰 又東南

贛州府志

卷三

信豐山

三二

二十里曰鳳湖山舊傳有苦行僧趺坐而化塑像立寺
今廢

按大龍寺名舊志以寺名山者誤山嘗產異花如白
蓮名勝志云大龍山有龍井夜則紅光燭天在縣南
百二十里

木公山在縣西百里邑山脈祖此有天池廣數畝 東爲
覃塘山有澄潭數畝 又東爲雉山酷肖飛雉 又東
爲下竦山

按覃塘山縣志作龍塘山有魚化龍而去故名
明黃戴元遊龍塘山詩云此時風正暖草密正多閒積
霧猶凝石殘花欲遍山插秧歸隴上聞磬發林間谿谷

靈光遂盤旋不記灣

武龍山在縣治東五里下流關鎖山頂一寺有真武銅像
明知縣母擇鄰建最高亭於上易名騰龍山 東三十
五里爲樂平山石泉不涸 又東四十五里爲鷄籠山
高八百丈頂平傍峻
國朝魏書遊武龍山詩云孤亭最據武龍巔拔出高峰
何曠然雄砥波濤環郭外勢凌培塿伏人前半生踪蹟
成竒賞片晌松風結勝緣雨態雲姿看向盡紅輪又欲
過南天
巫山在縣西北四十里接南安南康界有嶠嶺其上多怪
石有巨人跡巫水出其下

贛州府志

卷三

信豐山

三三

明黃注上嶠嶺詩云憑高緣複磴躋險躡危岑樹出參
差景鸚調遠近音歸雲含疊嶂落日下平林屬目看苑
宇徒傷野客心

大望山一名大帽山距縣南一百二十里高峻陡險頂可
望鄰邑諸山

興國縣山

三台巖在縣西里許倚小春澗南三峰蜿蜒躡磴架閣一
名觀音巖劉崧有三台巖記元末爲旌陽道院有放鶴
看雲二亭故址山頂有真武觀即雷壇也越里許爲江
東祠 南折二里爲金鷄冠嶺蒲衣道人長春院在焉
有幻寓室葛藤窩清碧亭又有慈祐寺無邊上人所居

今皆廢萬歷間里人作書院祀賢令吳宗周
國朝沈時棟三台巖詩云花雨飛寒香長夏無炎景誰
將普佗巖超然置人境大士置趺踰端居契深靜上覆
林木陰下俯水天影清響迴涼颺餘霞帶輕暝佳約欣
始諧游目時一騁屢聞溪鳥喧但覺石泉冷殷雷過南
山夕陽破西嶺幽壑瀉復停連峰散逾整白雲若波濤
彌望數千頃自顧機事捐况乃幽思併皎月照上方踞
蹠漏初永

羊山在縣西十餘里遙與贛縣鹿山埒諺曰羊山觸鹿山
伏巔有寺東南拱邑城其旁有泉甚甘冽折而南名
西江徑險山色殊秀與贛縣龔公山相屬上洛山在其

贛州府志

卷三

興國山

三四

間木客題詩處也舊傳有石墨可書

國朝蕭相經遊羊山詩云殘暑薄秋冥絺綌猶在御招
尋度古邱悅與竹林遇邨喧稻擔歸溪咽水聲駐盤回
上山麓點點白雲驚半空憇石稜羣岫俯可數崧岵遙
在望羊麕相牴牾躡步陟層巔敗刹老僧住蘭谿企昔
賢剝蝕餘殘句清詩故無匹妙諦孰叅悟頽陽不可留
械械風生樹回首望衆山蒼煙莽迴互謝芳詩云每
懷羊嶺最高峰此日登臨一望空天外白雲時出岫路
旁黃菊自成叢方山疊口遙連北澗水頽流只向東木
落荒邨人影斷數家茆屋倚山楓鍾昌盛詩云未把
茱萸佩先登破綠苔山峰雲外出城郭日邊來古木迎

風響黃花傍沼開相觀遊未遍斜照逼人回
池源山在縣西三十里池口有南北二峽三十六坎深閉
幽隱神物所宅禱雨輒應

秦娥山一名白雲峰在縣西四十里舊傳唐時秦娥自楚
來虔得道能致雲雨有東西二井及晒衣石衣影猶存
一曰秦娥古孝女土人立祠祀之每三四年雷必一發
其處 山腰曰君子嶺山麓曰櫟樹崖

國朝張尚瑗遊秦娥山記云興國秦娥山以祠而名爲
邑人及贛泰和萬安里俗翁嫗襁褓奔走之地香燈膜
拜嘗踵於路秦娥之蹟誕漫承訛舊志稱唐時自楚來
虔得道能行雲雨近者王封公漱泉先生則以爲孝女

其說於世教有裨亦無明徵 國初祠燬於寇康熙己
巳僧函潔募構三年乃成歲乙酉僧崑智復營前棟皆
鍊瓦石垣山勢聳而巋拔地十五里風雨砰擊澆脆者
易於摧泐故庀材爲艱每春雷動蟄三五年中必一發
其處破楹及莛輒復更葺以爲常祠東西各一泉凡山
祠必因泉絕汲不可栖也戊子八月下浣余以公暇遊
焉道龍坪過鰲源計程六十里鰲源在山坑中地勢已
高復十餘里造白雲峰之巔乃得祠踞邑之西鄙祠面
東拱向興邑曠望百餘里諸山林立殆千百數無不出
其下入祠觀雷擊柱若剗其中乃丁亥春新震者僧曰
口之來幸早少頃大雨至矣顧左右遠山皆滃雲雨脚

下垂絳虹蜿蜒起於山前俯視猶在四五里下貫諸山之巔諸山叅錯而虹直諸山高下而虹平諸山斷續而虹若麗若懸橫亘自如既漸遠山不可見虹乃入於雲際良久雲合迷離虹滅雨至相與入祠避雨夜分雨息涼月窺檐夜氣淒然甚寒黎明僧啟戶請觀雲則白雲如團絮如堆雪瀰漫布濩於山之腰祠處謬然而清沈然而皎下視雲所積去祠亦三四里諸山爲雲所汨爭露其尖千百培塿若溪灘亂石涌現出沒於水面山尖皆黝黑色以雲白相形故也逡巡紅日升於暘谷山色紺赭相激映雲乃霏霏奕奕蕭索飄颺漸減漸微以迄於盡憶予入閩行江郎山中夏雨新霽白雲晨蒸林巒

上冪下豁若橫截者冬暮登泰山抵磨崖碑下日次禺中忽風起雲涌比肩離立不能相顧疾趨而下十里乃撤二者皆雲上而山下其景相符茲則山上而雲下矣豈十五里之白雲峰出泰岳上乎聞之黃廬二山有雲海意者其類是乎僧言此山中凡深秋之雲皆如是夏雲甚淡冬雲則汗漫無際祠亦冪於雲中予乙亥池陽渡江作飲虹記以虹宛轉依山不能麗天乃今所見虹乃麗於山之庠者山高則虹亦不越不較然乎興國在萬山中山龐雜不可名秦娥山之名里俗以襤褸而趨之其說不足徵亦不足辨求其嘉樹珍石足以賦咏盤桓者亦一無所有獨其能蓄雲又能召雷而予之來登

也適與虹值聊述而傳之不可謂非山之藉是以名云
國朝詹宜倫遊秦娥山詩云諸峰環列鬱崔嵬穿穴憑
崖構竹扉孝跡有無存禱祀仙踪雲雨信依稀新烟乍
湧晴攤樹曉霧初零暗濕衣清籟遙聞天外發恍疑笙
鶴傍空微 吳陳琰秦娥行云秦娥種麻來自楚父欲
嫁娥娥意沮終身事父不字人怪底荒唐侈雲雨孝行
何減曹家娥迎神送神村巫歌行將愧彼遠遊子親在
失養空蹉跎 陳珏詩云君不見宋時孝女陳三姊辛
苦養親采菱米又不見東沔屠家女酷貧採薪績麻供
瞽親親死廬墓不肯嫁二女名芳百世下興國秦娥來
自楚侍父晨昏惟藝苧兒如適人父誰養父欲嫁之終

不許吁嗟生男勿喜女勿悲有時生女勝男兒豈知至
性存巾幗奈何舉女棄如遺秦娥至孝關世教邑人山
頭爲立廟興雲興雨疑神仙從來神仙出忠孝 張參
魯詩云娥之來兮雲從紛靄靄兮兆歲豐娥之去兮乘
雨露霖沾漑兮長我禾黍娥有親兮不忍離親欲嫁娥
兮親居與誰娥奉親兮沒齒孝可通神兮宜百世祀望
娥不至兮娥無我違几席陳兮甘且肥室養黃耆胥服
娥教占雲而課雨兮羣進而謁娥廟
萬礫龍泓距縣九十里兩崖塵立瀑布飛下數十丈三折
瀦爲池廣二三畝巖石皆蒼潤掛壁松檜爲虬龍形舊
名龍湖張尚瑗易今名

國朝張尚瑗萬礫龍泓記略云萬礫龍泓北去白石村二十五里西距方泰東南距佛嶺皆二十里重岡複嶺近數里內無耕藝者樵採間一至焉舊志稱積水成湖風雲變態遙聞城市喧闐聲余必欲一躬造核其實無解事導引登陟紆誤疲於覓路至則深箐怪莽邈無人蹊西隅稍有犖确可通眇者乃伐木鑿嶮以通之衣短後蝻螳緣而下行一里餘以達於泓東西縱可一里許南北廣四分之一聲鏗錡如雷水皆震盪作傾簸狀顧猶未得覩瀑也泓之西深窅不可測東有巨石橫絕溪面人乃乘之以渡深者及肩淺猶及腰子爲從者負而渡於南厓北面對瀑瀑之廣十餘丈仰望厓巔數十丈

而氣勢砰磕若從天而下其上稍東折復自東稍折而西以入泓承瀑之壁復多竅穴注者污者磅礴飛歎不風而翔成雨而驟立南厓觀者濺沫跳珠霑灑襟袂頃刻皆成淋漓疾雷奔掣白日晦冥凜乎其不可留也厓石皆蒼潤挂壁松檜爲虬龍形水花多萱蘭山丹鳳仙之屬楚楚娛目按礫之爲字爾雅說文未之詳始見陸子象山集中江右方言也閩山多呼漈乃山水相際之義泓尤礫所叢萃故名萬礫舊志闕聲者瀑也風雲變態者瀑態也樵夫野人不知爲瀑而驚顧傳譌操筆之人又未嘗親履其地宜乎鹵莽而失實矣余擬磴道使□可通行并鐫龍泓字於壁以與後至之賞竒者共焉□

國朝陳沂震萬礫龍泓詩云雲山重疊水分派巖壑彌
深路彌隘耕耘跡絕樵牧稀中有神龍藏狡獪龍行上
天水爲宅澄潭深窈人不測憑將噓吸水爭趨噴薄飛
泉落千尺經過虛莽苦迢遙崎嶇詰曲行三朝却從峻
嶺下深澗接踵引臂如猿猱乍窺奔瀧已心喜漸覺砰
鏗聲入耳矍然異境非人間絕壑崑崙不容趾褰裳濡
足踐危石飛沫跳珠頻濺激舉頭峭壁插青冥迸散懸
流轟霹靂水歸龍窟便如龍蜿蜒夭矯常飛空上盤下
折勢不定銀河雪練難形容同行年少誇矯捷直上巉
巖心不懼憑高對瀑境彌親愧我孱軀跡難躡咄哉異
境人不知紀載紕繆傳聞疑探竒闢險由明宰羈客遭

逢豈自期峰巒蔽虧雲物晦未晡已訝陽烏墜策杖歌
呼度嶺歸只愁潭底驚龍睡

花橋山以橋得名大小兩花橋相去里許東西崖壁高數
十丈石色或黝或赭勢若搏鬪山西有僧舍懸崖間若
櫓巢然南有迴磴曰石罅

國朝鍾秀源花橋巖詩云橋橫碧澗水潺湲緩緩步斜亭
石徑攀無限白雲連翠壁洞門深鎖不須關 鑿壁穿
雲路欲迷盤迴落落染山暉孤村寂寞人行少一樹寒
松接翠微

敦邱在縣西北四十五里小邱五六形如覆盂知縣張尚
瑗名曰敦邱鐫題石壁壁甚高廣陂水深窅不可測有

天然魚摻 西北里許爲定光崖泉出石上 長逕□
山曰陳嶺趾跨數里背距泰和浪川洞三十里爲虔吉
阨塞

國朝張尚瑗敦邱詩序云興國長逕口有山如覆敦予
引爾雅以敦邱名之係之以詩詩云嶺北山形盡堆阜
困蠡坡陀呈怪醜白羊南下藍陂路禾黍油油見疆畝
連岡起伏蹲路隅中堪愛玩幾培塿大樸不雕形混沌
精鍊磨礪顏色黝團如列幕施穹廬森如釘座蒸饅首
首尾弭帖脊背崇中央隆隆何所負衛城食已僧置鉢
澗池宴罷王按缶我援古義釋邱名位汝珠盤與玉卣
若教彌谷變敦彝酌樽於衢人醉酒咄哉天道盈必覆

贛州府志

卷三

興國山

四十

孟而覆之安且久神禹鑿河釜得名文王繫易艮无咎
敦邱邱下編戶千誰施幃庇安茆葑詩成驛霧告山靈
大笑巴吟供覆瓿

靈山在縣東十五里即南康玉山有獅象香鑪鉢盂錫杖
方竹徑芭蕉洞滴珠匹練二泉皆山幽絕勝處

按南康記云興國玉山上石桃故老云昔寒桃生
於巔嶺隱淪之士欲取啖食之因變成石有古寺栖
其中巨嶂拔地數十仞半壁一竇中石像趺坐名飛
來佛寺名龍華宋時有鐵船僧自廬山來回壁於此
國朝楊侃遊靈山記畧云侃以丁亥仲春客湫江五月
之望遊金斗山馬上望靈山諸峰濯濯雲氣中乃以是

月十九日偕劉子暨陸子杞莊並轡往遊焉出郭日
午暑甚將雨須臾雲益集衣袂間軒軒得涼意急行抵
源頭即靈山入逕也兩山並峙障日騎行石齒間泉淙
淙從馬蹄下作聲行二里許石壁益陡峭湧出天半香
爐鐘鼓諸山叅差羅列有觀音巖嵌懸巖之半巖中石
像縹緲下瞰而巖上竹樹如繚垣入寺主僧次燈與其
徒來迎劉子相視而笑蓋茲山劉已四遊云稍憩僕夫
以將雨促歸僧曰仙女潭近在眉睫獨不顧耶遂解鞍
止宿日向暮雨不止出尋溪東入方竹逕兩巖嵌欹仰
視碧漢濶不盈幅碧蘚中雜生秋海棠鳳仙山桃花風
蘭紺蓮之屬稍折則方竹森蔽新蕉數處經雨後色益

鮮瑩踰小澗陟石級忽空曠可坐眺舉頭見石峰參天
黝赭間錯拔地數十尋窮山逕復得珍珠泉噴薄圓滑
頃刻盈數斛轉寺門又西走龍王坑兩石撲溪上曰仙
人橋坑半有巨石昂首兢兢出雲表曰龍頭巖俄而殷
殷雷鳴迫視之乃匹練泉得雨勢壯居然素光搖曳成
瀑布返寺浴罷次公爲陳伊蒲饌煑茗淪粟焉夜就枕
聽風雨瑟瑟從巖後作江濤聲晨興飯後庶次公堅欲
爲遊潭導行數里舍騎攬衣緣山側幾不可步又下度
塍間從草中沮洳行抵潭路愈峻聯陟數十級行者生
喘再陟到百間房則石障百仞排展如屏風中作凹穴
知半剖瓜匏剝其中者大小數百相綴山中猿狖以爲

窟穴出則一黑猿居前兒孫纍纍群採山核克食或聚
穀果釀酒巖間土人呼爲猴酒及潭徑益險始猶偃僂
行蒲伏泉從山頂奔騰下怒響砰鉤陰幽觸眉宇炎氣
頓消循樵徑下山涼風南來執韁者候於路乃緩轡入
城予觀靈山竒邃秀拔較之世傳道書所載海內洞天
福地諸名勝雖未抗伯仲行然窈而深繚而曲挺特表
異至此固高人韻士樂爲品題位置者也

國朝吳之章靈山賦云漱水東北綿亘巒岫幽巖邃壑
沓嶺層巒蜿蜒紛糾厥名靈山作東方之巨鎮爲平川
之大觀翠嶂千尋列其外頽崖百丈隱其間寺古而流
雲長鎖山深而積靄不刪欲窮此中之竒奧湏費旬日

之躋攀其峰則石筍凌空香爐拱秀鐘鼓峙其旁鉢盂
覆其右天外之石萼並撐雲中之蓮花爭透其餘岌嶮
嶙峋巖嵒屹峙者悉等山端之列岫其巖則有鄰霄環
繡重甌響泉獅子伏虎跨谷蹲巔如堂如室如庭如軒
高可十仞廣或數筵噓翕羣山之雲氣吐納百里之嵐
煙他如厂開峭削磴絕攀緣可望而不可即者千古讓
飛來之金仙其泉則有仰湖仙潭滴珠白練裂石迸崖
鞭雷激電如怒龍之下晴天如渴螭之投幽澗至於淳
泓淵瀦冰鑑不如清冽甘香鬼神可薦其洞則雙崖並
峙一綫中分下臨絕壑上逼無垠盛夏而驕陽不到隆
□而春色長存雷殷聲而疑虎風度峽而聞猿其藪則

有石竹芳蘭瑞香菌桂薜荔芭蕉馬蘭石薤金橘海棠
紫薇朱柰郁秀芬芳繽紛藻繪花氣集而空濛翠光浮
而曖曖尺壤蒸五色之芝拳石產叢莖之蕙凌霄高百
尺之標方竹挺四時之概經歲寒而不凋歷燠乾而逾
翠其中則有盤攫之松懸崖而竦纓絡之栢列砠而生
栢欄摺揲橘柚晶熒楓丹映日栢赤烘晴玉梅鬪雪仙
李逢春白鷗練鵲山雉倉庚遷喬出谷響答嚶鳴麋鹿
遊而呼友獮豸出而尋盟或儻儻而俟俟或狃狃而獠
獠自虞人之不禁而樵採之相尋空餘朽株與樸檉曾
無茂樹之陰森然而泉石煙霞素稱饒裕谿山景物不
覺凋零猶足以點綴林巒之勝流連遊覽之情爾乃寺

結精藍山開華藏鳴棟嵯峨禪關幽敞門當晚翠之屏
窻列廻天之嶂蒲牢踈出谷之聲闍黎多超塵之况日
惟種雨與耕雲時或尋山而策杖故山得人而益彰名
副實而何讓若夫高人竒士選勝搜竒吟筇戾止遊屐
忘疲酒攜從事囊佩小奚騁懷愜欲對景抽思向山靈
而索句歸竹院而成詩信乎一邱一壑皆有樂地一遊
一豫貴與心期又何怪戴處士之買山而隱賀秘書之
乞湖而居於是山也吾將挈釣詩之竿裹入世之足躡
赤松之芳蹤結梅花之書屋臨清流而濯纓採紫芝以
辟穀何必遍五嶽之遊而動窮途之哭也哉

明唐子儀鉢孟峰詩云天地鴻濛久開闢知有神僧□

留錫圓峰形狀如覆盂萬古巍然著高跡愚公用力不可移鬼工獻巧那能施直恐黃龍在其下晴雲冉冉微風吹 芭蕉洞詩云芭蕉種成陰作洞九夏涼生禪榻凍誰言脆質不禁秋大葉披披搖翠鳳禪餘坐對情依依題詩寫遍日暮歸幾回吟罷心境寂碧色遙映袈裟衣 伏虎巖詩云空巖竒偉如伏虎猛勢猙獰自今古陰陽二氣幻此形留與神僧傳佛祖頭城尾旌徒自豪寒雲落日風蕭騷幾回出定坐清夜長嘯不聞山月高 國朝王思軾靈山詩云名山洵多竒靈秀冠茲邑間氣亘輿圖殊形表坤極諸峰鬱青蒼羅列數百億得無創構初實煩造物力顯晦自有時天巧不遑匿軒然神

鬼工翻爲後人得遐思羨飛騫嘉覽竒登陟寧辭杖屨勞一往窮不測巖巒數虧蔽林果富封殖江濤迴練光石壁類鐵色乃知禽向遊何常限封域五嶽安可尋三山未能即回首渺曠觀層雲盪胸臆 張尚瑗詩云行郊方綠暗到寺已黃昏爲撫新摩碣來尋舊宿軒三明叅佛火百種變禽言清夢晨鐘醒疏櫺上曉暎 碎瀑千尋練明霞百堞城石頽藤小絡雲破筍孤撐黃鷄窺巢立元猿挂木迎重遊有新獲不負好山行 暗巖經宿雨生意發新篁黃玉松肪脆青雲石髮香膨脝排鬲甌削劣度車箱自笑跛狎足猶登九坂岡 稍喜詩僧對翛然遠俗塵貌癯蒼鶴脰手斲黑龍脣負荷林泉擔

支銷風月縉鐵船遺跡泯賴爾溯知津 吳之章詩
折盡羊腸正午鐘同人方得駐吟筇小橋寒鎖門前水
曲徑斜通院側松幔捲晴崖臨萬仞雨餘空翠積千重
不因鳥背殘陽少尚欲梯雲看列峰 北折五里東西
竇穴纍纍相綴如剖甕側立之狀舊名百間房邑令張
尚瑗名曰重甌鐫題東巖其西巖旁竅曰小有天由重
甌側入偃僂行數十武仙女潭在焉

國朝王思軾重甌厓詩云清溪貫兩山前征路逾緬西
厓鬱纍纍錫名曰重甌疊嶂挂紅泉層巖護蒼蘚取徑
入盤陀披雲下圜轉側見乳竇垂俄覩蜂房展伊誰肆
瓶罌羅列綠絕巘人力欣始加榛莽亦已翦磴道資攀

援林扃足游衍肯辭疏鑿勞彌覺高深顯陶穴太古風
遺跡尚黽勉累棋勢苦危運甕智恒淺遙思抱甕言於
以安孱蹇 吳家騏詩云路窮山愈高四睇怪而赭一
步一危級來此絕壁下橫羅百罌盆攻鑿非力假翳豈
失瓊漿空半挂三竿腹行窺幽宮點滴飛雨灑寂寂水
底天悅覩鏡光冶石縫露凝蘭谷罅風撼檟劉郎去不
還流水空明瀉洞口碧桃花悠悠付誰者

金斗山在縣東十五里赭阜峻嶒自址達巔無寸土陡絕
處鐫石爲級以通行者有真武祠盧公巖舊傳盧禪學
佛於此或曰盧冠象所嘗遊也泉仰出石上暑暍不竭
背爲瀧石洞出紅石

國朝王思軾金斗山詩云虔州古豫章靈嶽望盧阜其
外茲山尊崔巍應南斗下發湫江源巖谷自牝牡崇嶺
鬱岩堯連岡互紛糾上顧天門高下鎮坤軸厚紆迴抱
城郭磅礴帶林藪諸峰競趨踰列嶂共先後亦如衆星
朝北辰執樞紐緬睇良方輿爲形實峻陡勢壓崆峒巔
險出雩都右二水并三江一氣納八九稊米視川原茹
吐量所受方知大造竒賦形無不有斯理誠難明能者
爲一剖矧乃景物嘉俯仰得兼取絕壁堊丹黃層厓寫
深黝雲縈灌木陰石瀉清泉瀏振衣陟青冥憑高絕氛
垢河漢淡鬚眉煙霞落襟肘我昔愛名區郊垞卧來久
商芝種滿園楚蕙樹盈畝時編薜荔裳或偕麋鹿友中

歲入風塵頻年事奔走服食羨松喬容顏嘆蒲柳徒懷
禽向遊取笑沮溺耦夙願果獲諧良期寧忍負荷蓀出
田間躬耕依谷口興愜寄圖書忘機對尊酒晏子齋牛
山羊公悲峴首千載諒如斯令名誰不朽 張尚瑗詩
云癖尚耽搜剔郊行涉莽蕪攝衣向金斗濯魄在冰壺
龍徙灘聲壯蛇盤石級紆憑高強留句得擬北樓無
劉紹權詩云漸拂嵐雲露石稜堆厓拾級逞光登山腰
已覺孤城伏峰頂還看遠樹層隱見澗光裁素練斷連
畦影碎春冰幽尋自是靈岑好曠莽還驚得未曾 李
杜詩云拾級層峰上鄉城一望分泉添秋過雨巖宿夜
口雲煙火冥濛辨溪聲隱約聞飄然人境外不復染塵

氛

崖石寨距縣東八十五里從蕭公巔入絕壁萬仞連亘數
十里相傳爲文天祥屯兵處後登者獲鏡與劍歸劍光
熊熊上燦星日 縣東一百四十里有蓮花山亦天祥
屯兵地與崖石對峙者爲豬嶺牛嶺 又距三十里爲
胡公山一名蜈蚣山與螃蠏藪蓮花洞皆嵯峨聯屬四
五十里其腹背與寧都永豐錯壤元宋紅巾之亂爲綠
林淵藪康熙十八年撫定寇盜始以武弁駐防
太平巖在縣東常清觀後內有石竈石人水臺竹橋之
勝

東龕在縣東北八里相傳爲唐鍾紹京讀書處舊有古寺

贛州府志

卷三

興國山

四七

崖前有試劍石中裂欲斷宛轉數曲翕然而合中有石
罅水深成澗鑿石架棧行半里許劃然中開崖前有石
筍石舫筆架諸峰又折而東兩崖復合崖水自靈湖來
有巨鯉帶銅環邑知縣張尚瑗有記

元滕賓讀書巖詩云巉巖石室漱江東舊隱開元越國
公勝迹不磨遺像在書聲時落半天風 靈湖石詩云
巖竇中開小有天蛟龍潛蟄幾何年不輕奮鬣爲霖雨
時傍雲根吐翠煙 筆架山詩云俯揖前山錯落橫珊
瑚架聳筆花生我來欲醮滄浪水仰首摩天寫太平
銅環鯉詩云洞宮曾此□□□解却金魚掛壁間一夜
風雷天外動化龍飛去不知還 明唐子儀讀書巖詩

云女媧煉遺補天石六丁下鑿開巖室山靈呵護不敢
居留與中原貯秘籍至今猶聽唔伊聲罡風吹度淵龍
驚白雲萬古封故迹汗青歷歷留芳名 試劔石詩云
怪石兩分自中斷形勢巍峩色蒼紺令公試劔劍有神
應識當年平內難鋒鏑不須耀雪霜匣藏三尺紫電光
若教砥礪剗犀兕空使李廣彎弧長 筆架山詩云雨
沐蓮峰青朶朶移來宜付中書卧東溟爲硯雲爲箋寫
遍長天愁欲破令公手携登玉堂鳳池波浸山蒼蒼龍
蛇鸞鵠有神助九霄夜貫晴虹光 銅鑲鯉詩云放生
湖中有金鯉身帶銅鑲弄清泚多年變態化神龍三十
六鱗雲氣起已能濟世成甘霖汪波涵育德澤深霧鬣
贛州府志

卷三

興國山

四八

茫茫不復見千年空負琴高心 瀑布泉詩云百尺飛
泉如瀑布直瀉懸崖幾朝暮氣迷雲縷蛟綃垂光射水
簾月鈎露當年爲挽錦袍仙好咏銀河落九天東龕洞
口流不歇千古界破蒼山煙 李天敘讀書巖詩云紅
透踈櫺日正東淒淒芳草憶鍾公山禽猶識讀書韻時
向巖前噪曉風 試劔石詩云當年洞口試霜鋒石上
曾遺切玉蹤却笑孫劉分狠石到今劃處綠苔封 靈
湖石詩云石窟丹成火欲然湖光射日浸重淵巖雲忽
作三更雨渾是壺中一樣天 筆架山詩云玉峰次第
插天青俯視三江一硯平想是仙翁曾閣筆朝朝此處
有雲橫 銅鑲鯉詩云昨夜風雷起碧潺錦鱗何事去

仍還山靈爲惜神奇助故與銅鑲掛壁間瀑布泉詩
云飛流萬丈挂層巒潑眼還如瀑布看莫是銀河原有
漏九天直瀉自漫漫 國朝蕭師諤東龕詩云令公巖
迹未曾湮况有文章托後塵鈇鋸到今人是柳桃源一
去地非秦石綠瘦削凋青髮水自漣漪濯錦鱗不盡排
徊今古意半山斜日照遊人 黃文澍詩云蒼崖忽破
曙光開澗底人行繞綠苔樵語隱聞天上出白雲時見
足邊來劍分萬仞非頑鍊鬣起千年有迅雷相對徘徊
忘薄暮霜林斜日滿荒臺

方山縣鎮山也在東北四十里方泰以此名鄉山頂出雲
城中輒雨諺曰方山戴笠滿街著屐 又數里爲張公

贛州府志

卷三

興國山

四九

山巍然聳秀亦本山支翼

瑞山在縣南十五里又名掛榜山山土裂邑士必登科故
名 又兩山對峙壁立千尋者爲天橋石上有飛泉高
百餘尺中有石橫過如橋故名

對嵩巖在縣北四十里一名通天巖又名雙龍巖岫穴深
廣可容數百人崖頂平曠處名仙人碁盤張尚瑗以對
臘石砦諸峰大小三十六合嵩陽之數易今名鐫石壁
西行數里曰寶石數峰員峙一名員石

國朝張尚瑗對嵩巖詩云維嶽古嵩高厥峰三十六黃
海與幔亭并峙雄南服漱江嶺北支羣巒春筍矗植如
夏屋楹叢如箭羽鏃海舶卸帆檣霜林脫葉木屈指枚

計之四九數更僕堞蒼老陽策吹律黃鐘谷相直面層
巖窳窳施重屋畦町隔牛鳴坡陀堪鹿宿夕陽睇諸峰
一一皆在目露掌翠森梢雲鬢青起伏鐫崖錫以名神
遊二室麓相對不相厭涼岑新雨沐黃文澍詩云洞
是何年闢凌空象外幽苔文成綠篆石色擬丹邱地骨
開天闕雲根入市樓赫曦看海曙三十六峰頭 鍾自
持詩云古壁青蒼翠欲流虛巖如壑可容舟夕陽霧靄
矇矓裡三十六峰面面秋 歷歷嵩陽在眼前山靈深
得史公憐蟬聲蕭瑟西風起吹斷幽巖一線煙

覆笥山在縣北八十里高二十餘里東望金精西眺芙蓉
北接青原南瞰章貢爲一邑羣山之宗舊傳上有平湖

周數里湖中石鴈春秋時能羣飛有古祠多靈草異物
兩泉泓然紗帽峰馬鞍石諸勝錯落南崖間雲牕私志
云涓子發石笥得秘書十二卷因以爲名

國朝張尚瑗覆笥山詩云我昔家鄰縹緲峰禹書金簡
隔凡蹤我今謫居覆笥獻秘籍天人經世卷平生好書
兼好山擬探雲笈搜娜嬛芒屨籃輿簿書暇嵯峨萬仞
躬躋攀壞剝摧頽古泉冷白雲滿地餘榛菅輸寥之館
渺何許巖扉無路敲雙環自古神山不可至少霞夢醒
新宮記是否仙公許補亡百首蕪詞題覆笥

三陽磔在縣北八十里下爲竹管峒叢篁密篠三十餘里
無雜植民舍皆以竹爲之磴高石泉飛迅積瀑成池

國朝張尚瑗三陽礫詩云渭濱千畝史公書何似山邨
萬頃餘磴曲谿迴三十里蕭蕭寒綠遍籜筴平鋪瓴
甌密編垣荆不堪扉槿謝籓正誦黃州竹樓記琮琤碎
玉雨翻盆層巒五里締山莊屈注流泉蓄水塘水閣
軒窻山絕頂風漪一片碧蒼茫耆壽坊傳百歲翁三
朝耕鑿古人風也從合譜趨流競詞苑標題護碧籠
龔黃詩云百丈三陽礫人家半嶺浮路從溪口下水自
石腰流沙撒邨燈亂香來草木稠宛然蘄楚意削竹覆
山樓

大烏山距縣北一百三十里高二十餘里過鐵甕嶺爲龍
頭灘有黃坊隴石上有鹿跡虎跡其巔曰登天坊祠曰
三仙殿明鄒元標題曰重蜡報功石穴二名風洞雨洞
東楓邊南茅坪西大龍皆興國境又東有密石寨名
小烏山